



# Uhapšeni u akciji "Papirus" predati Tužilaštvu KRALJI IDENTITETE ZA 10.000 MARAKA

Originalne pasoše BiH osigurali za 36 kriminalaca iz Srbije, Crne Gore i Bugarske. Uhapšeni Bojan Đokić, Izet Redžović i Savo Manojlović

**N**akon što su uhapšeni u okviru policijske akcije "Papirus", koju su u ponedjeljak u Sarajevu i Zvorniku izveli **SIPA**-ini inspektori, jučer su Bojan Đokić, Izet Redžović i Savo Manojlović predati u dalju nadležnost sarajevskog Kantonalnog tužilaštva.

Oni se sumnjiče da su dio organizirane kriminalne grupe koja je pribavila lažne dokumente BiH za 36 osoba koje pripadaju kriminalnom miljeu zemalja u regionu.

Osim ove trojke, **SIPA** je u ovoj akciji uhapsila još sedam osoba, ali su oni pušteni na slobodu s obzirom na to da nije bilo zakonskih razloga za njihovo dalje zadržavanje.

-Tri osobe koje su predate Tužilaštvu bit će zadržane 24 sata, nakon čega će se odlučiti o daljim mjerama - kazala je za Faktor Azra Bavčić, glasnogovornica Tužilaštva.

Svi uhapšeni se sumnjiče za organizirani kriminal, te krivotvorenje isprave i ovjeravanje neistinitog sadržaja. Oni su, prema do sada dostupnim informacijama, kriminalcima iz regiona nabavljali pasoše BiH i prodavali im za 10.000 KM. Navodno, ukradene identitete su imali kriminalci sa područja Srbije, Crne Gore i Bugarske.

Prvobitno su objavljene informacije prema kojima su u sve upleteni i uposlenici Agencije za identifikaciona dokumenta, evidenciju i razmjenu podataka /IDDEEA/. Međutim, iz ove institucije su demantirali takve navode.

- Nije uhapšen nijedan službenik IDDEEA-e niti su jedinice ove agencije bile predmet policijskih pretresa - kazala je za Faktor Amila Opardija, glasnogovornica IDDEEA-e.

Sličnu akciju 20. juna ove godine proveo je i MUP RS-a kada je uhapšeno osam osoba, jer su ukradene identitete prodavali članovima kriminalne grupe Darka Šarića i osobama koje su se tražile zbog ubistava i pljački.

E. F.

## KO SU UHAPŠENI

### Automafijaši i šverceri

Uhapšena trojka itekako je poznata organima gonjenja u našoj zemlji. Bojan Đokić zvan Đurdo te Savo Manojlović privodeni su u oktobru 2014. u akciji „Golf“ i to sa još 26 automafijaša. Sumnjičili su se za krađu auta čiju su dokumentaciju prepravljali, te ih preprodavali ili su pak prodavali dijelove vozila. Izet Redžović je organizirao kriminalnu grupu koja je švercovala oružje iz BiH u Srbiju i Njemačku, a u pritvoru se našao prošle godine kada je uhvaćen na prijelazu Uvac, dok je pokušavao da prošvercuje veću količinu oružja.



Sa privođenja osumnjičenih u zgradu Tužilaštva



FOTO: I. ŠEBALJ